

Oqaasiliortut Ataatsimiinnissaat
Tallimannorneq aggustip 22-anni 2008 nal. 9.00
Ilimmarfimmi Oqaasileriffiup ataatsimiittarfiani.

Peqataasut: Eva Møller Thomassen, Ellen J.Karlsen, Abia Abelsen,
Stephen Heilmann aamma Carl Chr. Olsen
Allatsi: Katti Frederiksen

Oqaluuserisassatut siunnersuutit:

1. Tikilluaqqusineq
2. Kingullermik ataatsimiinnermit imaqarniliap akuerineqarnera aamma kingullermik ataatsimiinnerup siuliani imaqarniliap akuerineqarnera.
3. Saaffiginnissutit suliassartallit:
 - a. GTE-mi taaguutit (9.juni 08)
 - b. Center for Arbejdsmarked og Kompetenceudvikling – Sulisoqarnermik Piginnaaninngorsarfimmut Aqutsisoqarfik (12.juni 08)
 - c. Opatere (14.juli 08)
 - d. funktionær (27.juni 08)
 - e. qallunaatut imalt danskisut? (27.juni 08)
 - f. sygeplejestudiet kalaallisut taaguutissaa (4.juli 08)
 - g. Rødliste kalaallisut (16.juli 08)
 - h. immateriel (tigussaanningsut) (30.juli 08)
 - i. bygdebestyrelse aamma bygderåd (5.aug 08)
 - j. udryddelses truede dyr og planter (6.aug 08)
 - k. qujanartoq qallunaatut (6.aug 08)
 - l. individuel kontrakt
 - m. Perorsaanermi taaguutit (20.aug 08)
4. Allat


Inussiarnersumik inuulluaqqusilluta

Carl Chr. Olsen

Siulittaasoq

Katti Frederiksen

Allatsi



- 1. aamma 2.pillugu -

Siulittaasoq Carl Chr. Olsen tikilluaqqusereermat imaqarniliat kingulliit marluk eqqartorneqariarlutik saaffiginnissutit suliassartallit tikinneqarput. Imaqarniliami 28.29.majimiit atimut Angitivimmuut tunngatillugu oqaasertaliussassaq imaattunngortinneqarpoq: ‘Sumiorpaluutsimik akuersillutik taamatut atsiisoqarsinnaanera akueraat..’. Imaqarniliami tassanissaaq Naalackersuisoqarfinni taaguutit pillugit naqqiissutissat ilagaat journalip kalaallisut allanneqarnissaa: allagaatinut toqqorterivinngorlugu, tassanilu oqaatsip journalip naalackersuisoqarfiup iluani atuuttuunissaa nassuiaatigineqarluni. Kiisalu Avannaamioqatigiit Killiit oqaasiliortunik akuerineqarluni atuuttussanngortitaq atuutissasoq Vestnorden pineqaraangat, kiisalu Nunat Avannarliit pinnagu taaguut Avannaamioqatigiit atuutissasoq Norden pineqaraangat.

- 3.pillugu -

Saaffiginnissutit suliassartallit:

GTE-mi taaguutit akissusiorneqareersut maanna Oqaasiliortunit akuerineqarput, tassaasut:

1) Grønlands Turist- & Erhvervsråd (GTE)- Nunatsinni Takornariaqarnermut Inuussutissarsiornermullu Siunnersuisoqatigiit (NTIS)

2) Økonomi- & Adm.chef - Aningaasaqarnermut allaffissornermullu pisortaq

3) HR Koordinator - Sulisoqarnermut ataqaatigiissaarisoq

4) IT Koordinator - Qarasaasialerinermit ataqaatigiissaarisoq


5) Udviklingschef - Ineriartortitsinermit pisortaq

6) PR og Projektkoordinator - PR-imut suliniutinullu ataqaatigiissaarisoq

7) Projektkoordinator - Suliniutinut attaveqaqatigiinnermullu ataqaatigiissaarisoq

8) Markedschef - Nittarsaassinermut pisortaq

9) MICE-koordinator - MICE-mut ataqaatigiissaarisoq



10) PR- & Marketingskoordinator - PR-imut nittarsaassinermullu ataqatigiissaarisoq

11) Marketingskoordinator - Nittarsaassinermut ataqatigiissaarisoq

- 3.b pillugu -

Saaffiginnissut 3b Center for Arbejdsmarked og Kompetenceudvikling Sulisoqarnermik Piginnaaninngorsarfimmut Aqutsisoqarfimmik taaneqarsimasoq Oqaasiliortunit aalajangersagaareersut malillugit ima taaguuteqassasoq siunnersuutigineqarpoq **Sulisoqarnermut Piginnaanngorsaanermullu Ingerlatsivik.**

- 3.c. pillugu -


Qallunaatut oqaaseq opdatere ORDBOGEN malillugu imatut allaqqavoq: nutaanik ilaartorjaa aammalu opdatering: paasissutissat kingulliit ilanngullugit takussutissiaq. Taamaattumik Oqaasiliortut ataatsimiinnerminni taakkua tunngavigalugit opdatere allaqqatillugu oqaaseqatigiit sumut tunngasuuneri sunalu pillugu oqaatsip atorpeqarnera apeqqutaatillugu kalaallisut oqaasertalerneqarsinnaanera oqallisigaat. Orbogini allaqqasut saniatigut qarasaasianut tunngatillugu atorneqassatillugu oqaatsit ukua tulluartautipaat: **[paasissutissanik] nutarsaaneq.**

- 3.d. pillugu -

Qallunaatut oqaaseq alla saaffiginnissutaasimasoq funktionær ORDBOGEN-imi allaqqasut malillugit tassaavoq atorfilik [allaffimmi] (tjenestemand). Tamannalu aamma eqqortuuvoq, immaqali ullumikkut oqartarnerput malillugu oqassaagut pisortanik sullissisoq.

Funktionærip ataani sulisut assigiinngitsorpaasusinnaapput, tamarmilli pisortat pigisaanni atorfeqartuullutik.

Taaguutit ullumikkut funktionærip ataani inissisimasut soorlu fuldmægtig, AC-medarbejder il.il. atugaraavut, qallunaatulli oqaatsip



funktionærip atorunnaarsimasinnaanera Oqaasiliortut isummerfigiuminaatsippaat, taamaattorli oqaatigiinnassallugu funktionærlovimik peqarmat malitassanik aalajangersimasunik atuutitsisussamik.

- 3.e pillugu -

Saaffiginnissummi apeqqutigineqarpoq taaguut sorleq qallunaatut imalt danskisut eqqortuunerunersoq imaluunniit ullutsinnut naleqquttuunersoq. Tassani erseqqissaatigineqassaaq oqaaseq qallunaaq inuiannut kalaaliunngitsunut pingaartumik Europamit kingoqqisunut tamanut taaguutaammat, danskillu tassaallutik inuiannut aalajangersimasunut, tassa Danmarkimiit kingoqqisunut taaguut. Ullutsinnili taakkuninnga atuinitsinni qallunaamik oqaraangatta danskit eqqarsaatiginerusarpavut, taamaattorli Danmarkimiit pisuuneri erseqqissaaviginiaraangatsigik taaguut danskit atortarlutigu.

- 3.f pillugu -

Sygeplejestudiep kalaallisut taaguutissaa siornali saaffiginnissutaasimasooq uninngatikkallarnejarsimavoq ilisimatusarfiup aqqissuuteqqinneqarnerani ilinniarfiit assigiinngitsut Ilisimatusarfiup ataaniilertussat qanoq atserneqarnissaat utaqqimaaqqaarniarlugit. Maannalu pisortatigoortumik sygeplejestudiep kalaallisut taaguutissaa aalajangerneqarpoq: **Peqqissaanermik Ilisimatusarfik.**


- 3.g pillugu -

Qallunaatut oqaaseq rødliste Oqaasiliortut ataatsimiinnerminni oqaluuserereerlugu kalaallisut ima taaguuteqarnissaa aalajangiuppaat: **nungutaaratarsinnaasunut allattuiffik.** Tassani uumassusillit sulluunniit nungutaaratarsinnaasut pineqartut rødlistemut aallaaviummata oqaatsit *navianartorsiortut* imaluunniit *mianerisariallit* atornagit nungutaaratarsinnaasut eqqornerusumik oqaatiginnimmat atorneqarnissaa aalajangiivigineqarpoq.

- 3.h pillugu -

Immateriel kalaallisut qanoq taaguuteqarnissaa tamanit akuersaarneqarluni **tigussaannngitsut**-nik taaneqarpoq.

- 3.i pillugu -



Oqaatsit bygdebestyrelse aamma bygderåd ordbogini allaqqaneri malillugit ullumikkut atugaangimmata saaffiginnittup apeqqutigaa aalajangersimasumik taaguuteqarnersut. Taaguut bygderåd qanga atuussimasoq ullumikkut bygdebestyrelsinngornikuuvoq, taannalu nunaqarfinni aqutsisunik taaneqartartoq Oqaasiliortut unnerpaat, bygderådilu ullumikkut atuukkunnaanikuugaluartut ordbogit malillugit nunaqarfimmiut sinniisaannik allassimavoq.

- 3.j pillugu -

Udryddelses truede dyr og planter kalaallisut mianerisarialinnik oqaasertalerneqarsimanera ippigalugu saaffiginnittoq isumaqatigineqarluni kalaallisut ima eqqornerusumik oqaasertalerneqarnissaa siunnersuutigineqarpoq: uumasut naasullu **nungutaaratarsinnaasut**.

- 3.k pillugu -

Saaffiginnissut kalaallisut oqaatsip qujanartooq-p qallunaatumut nutserniarnerani ikioqqusup Oqaasiliortut qanorpiaq nutserinissamut pisussaataanerlutik apeqquserpaat, taamaattorli kalaallisut oqaatsip oqaatsit suussusiinut assigiinngitsunut pingasunut inissinneqarsinnaanera eqqartorpaat, tassaasinnaammat taggit, oqaluut taggisaasaq aammalu oqaaseeraq. Uanili apeqquteqartup taggisitup aqaatitup oqariaatsitullu atormagu immaqqa qallunaatut ima taaneqarsinnaavoq kær, lille pus, lille nor il.il.

- 3.l pillugu -


Oqaasiliortut isumaqatigiissutigaa qallunaatut individuel kontrakt kalaallisut **immikkut isumaqatigiissummik** taaneqartassasoq, soorluttaaqa aamma suliffeqarfinni inuillu akornanni taamatut atugaareersoq.

- 3.m pillugu -

Perorsaanermi taaguutit pillugit saaffiginnissuteqartoq qujarullugu iluarineqarpoq. Bente Hegelund saaffiginnissuteqartoq Nuummiillatsiarnerani naapeqatiginiarneqarpoq.

- Allat -

Schultz Lorentzenip ordbogiliaa tunngavigalugu ordbogiliassaq tuluttuumiit-kalaallisuumut, kalaallisuumiit-tuluttuumut Inerisaaviup Oqaasileriffiullu



suleqatigiissutigisaat pillugu Abia ilisimatitsivoq suliffeqarfiit ikiortiserineqarnikuunerinut atatillugu peqqinnissaqarfimmiut kisiartaallutik tunniussisimaneridik.

Kalaallisuumiit kalaallisuumut ordbog maanna naqitertinneqartoq aamma ilisimatitsissutigineqarpoq.

Allagaateqarfimmiit digitaliseeriineq ingerlanneqartussaammat Poul Egedep Fabriciusillullu ordbogii digitaliseererneqassasut, aamma Schultz-Lorentzenip atugaaraliaa: Det grønlandske folk og folkesind digitaliserer neqassasoq Pujup siunnersuutigisimavaa.

Oqaasileriffimmut saaffiginnissutigineqarluni apeqqutigineqallattaasarpoq ordbogi qallunaatumiit-kalaallisuumut elektroniskimik pineqarsinnaanersoq, tamanna Inerisaavimmiit suliarineqarsimammat Abiap suleqatiminut anngutissallugu neriorsuutigivaa.

Naggataatigut eqqaaneqarpoq KNR nuna tamakkerlugu sullissisussaalluni tusartitsisartuummat Notabenep tusaqqusaarutaa naqqiissuteqarfigilaaqqullugu, tassani nittartakkap nalunaarutigineqarnerani naggat toornermik taaneqarmat, naak toorneq naggallu aamma assigiinngissuteqaraluartut.

Inussiarnersumik inuullaqqusilluta

Carl Chr. Olsen
Siulittaasoq

Katti Frederiksen
Allatsi